

मार्निंग डोगरी न्यूज़ बुलेटिन, समें. 09.20 Hrs

<><><><><><>

## Headlines

- 1- जम्मू-कश्मीर ते हरियाणा विधानसभा चुनावं दे वोटें दी गिनत्री मुकम्मल, जम्मू-कश्मीर च 42 सीटें कन्नै नेशनल कांफ्रेंस इक्कली सब्बनें शा बड्डी पार्टी दे तौरा पर उभरिए आई, हरियाणा च बीजेपी उप्परोतली त्री बारी सरकार बनाने दी तैयारी च।
- 2- नेशनल कांफ्रेंस दे उप प्रधान ओमर अब्दुल्ला होरें आखेआ जे आई.एन.डी.आई गठबंधन आला धड़ा अपना लीडर चुनने दे बाद सरकार बनाने दा दावा पेश करोग।
- 3- प्रधानमंत्री नरेंद्र मोदी होरें आखेआ ऐ जे जम्मू-कश्मीर च कामयाब विधानसभा चुनावं भारती संविधान ते लोकतंत्र दी जित ऐ। उमर अब्दुल्ला होरें प्रतिक्रिया दिंदे होई मेद प्रगट कीती जे केंद्र कन्नै उंदा सरबंध सकारात्मक ते संघवाद दी मूल भावना पर आधारित होग।
- 4- मुख चुनां अधिकारी पी.के पोले होरें कामयाब चुनां लेई जम्मू-कश्मीर दे लोकें ते चुनां च योगदान देने आहले सब्बनें भ्यालें दा आभार प्रगट कीता ऐ।

<><><><><><>

## JK-Counting

जम्मू-कश्मीर ते हरियाणा विधानसभा चुनावं लेई पाए गेदे वोटें दी गिनतरी आला कम्म सबूरा होई गेआ ऐ। जम्मू-कश्मीर दी सारी 90 विधानसभा सीटें दे नतीजे घोशित करी दिते गए न। नेशनल कांफ्रेंस गी 42 सीटां थहोइयां न ते ओदी भ्याल कांग्रेस गी 6 सीटां थहोइयां। भारतीय

जनता पार्टी नै 29 सीटें पर जित हासिल कीती। जम्मू-कश्मीर पीपल्स डेमोक्रेटिक पार्टी गी त्रै सीटां थहोइयां। जम्मू-कश्मीर पीपल्स कांफ्रेंस, सीपीआई (एम) ते आम आदमी पार्टी गी इक्क-इक्क सीट हासिल होई। कल घोशित होए दे नतीजें च 7 सीटां आजाद मेदवारें अपने नां कीतियां। नेशनल कांफ्रेंस ते कांग्रेस गठबंधन जम्मू-कश्मीर च अगली सरकार बनाने लेई पूरी चाल्ली तैयार ऐ कि जे 90 मिम्बरें आली जम्मू-कश्मीर विधानसभा च 48 दा आंकड़ा नेशनल कांफ्रेंस ते कांग्रेस भ्याल पार करी गए न। नेशनल कांफ्रेंस दे नेता ते साबका मुखमंत्री उमर अब्दुल्ला होरें बडगाम ते गांदरबल आलियां दवै सीटां जिती लैतियां न। जम्मू-कश्मीर पीपल्स कांफ्रेंस दे सज्जाद गनी लोन होरें हंदवाड़ा थवां जित हासिल कीती। सीपीआई (एम) दे मोहम्मद युसूफ तारीगामी होरें कुलगाम विधानसभा सीट थवां जित हासिल कीती। पीडीपी पार्टी प्रमुख महबूबा मुफ्ती हुंदी थी इलतजा मुफ्ती बिजबिहाड़ा थवां हारी गेइयां न। नेशनल कांफ्रेंस दे नेता नासिर असलम वानी होर कुपवाड़ा थवां हारी गए। कांग्रेस दे रमन भलला ते तारा चंद होर बी अपनी-अपनी सीट थवां हारी गए न। भारतीय जनता पार्टी दे प्रदेश अध्यक्ष रविंद्र रैना होर नौशेहरा सीट थवां चुनां हारी गए न। जम्मू-कश्मीर च 90 सीटें लेई त्रऊं चरणें च चुनां होए। पैहले गेड़ दा मतदान 18 सितंबर गी, दुए दा 25 सितंबर ते त्रीए गेड़ दा मतदान पैहली अक्टूबर गी होआ हा। तोआई हरियाणा च भारतीय जनता पार्टी नै जबरदस्त जित हासिल कीती ऐ। पार्टी नै 48 सीटें पर जित हासिल कीती। कांग्रेस गी 37 सीटां हासिल होइयां। इंडियन नेशनल लोक दल गी 2 सीटां हासिल होइयां, त्रै सीटां आजाद मेदवारें गी हासिल होइयां।

<><><><><><>

**BJP-Best Performance**

जम्मू खिते च बीजेपी नै अजें तगर दा अपना बेहतर प्रदर्शन करदे होई 29 सीटां जितियां न। 2014 च पार्टी नै 25 सीटां हासिल कीतियां हियां। कांग्रेस गी राजौरी च इक सीट हासल होई। औदे बड्डे नेता जेदे च साबका उप मुखमंत्री तारा चंद ते किश साबका मंत्री शामिल न, गी हार दा सामना करना पेआ ऐ। भारतीय जनता पार्टी गी बी तगड़ा झटका लगगा ऐ की जे पार्टी दे प्रदेश अध्यक्ष रविंद्र रैणा होरें गी हार दा सामना करना पेआ ऐ। जम्मू खिते दी 43 सीटें दी जेकर गल्ल कीती जा तां 29 सीटां हासल करिए बीजेपी इक्कली बड्डी पार्टी बनिए उभरी ऐ। नेशनल कांफ्रेंस गी 7 सीटां हासल होइयां न। त्री थाहर पर आजाद मेदवार रेय जिनें 5 सीटां हासल कीतियां। आम आदमी पार्टी गी बी इक सीट थहोई। कांग्रेस गी इक सीट हासल होई। गुलाम नबी आजाद हुंदी पार्टी डी.पी.ए.पी, पीडीपी, बीएसपी, पेंथर्स पार्टी, जे.के.ए.पी गी कोई सीट हासिल नई होई।

<><><><><><>

### **BJP-SC-ST**

भारतीय जनता पार्टी नै विधानसभा चुनाएं च लगातार दुई बारी जम्मू खिते च अनुसूचित जाति लेई आरक्षित सारियां 7 सीटां जितियां न, पर अनुसूचित जन जाति लेई आरक्षित 6 सीटें पर उसी हार दा साकना करना पेआ। कुल 9 सीटां एस.टी लेई केंद्र शासित प्रदेश च आरक्षित न जिंदे चा 6 जम्मू खिते च न ते त्रै कश्मीर घाटी च न। बीजपी नै अखनूर, मढ़, बिश्नाह, सुचेतगढ़, रामगढ़, कठुआ ते रामनगर आली सीटें पर जित हासल कीती। बीजेपी नै जम्मू खिते च नमीं बनाई गेदी 6 सीटें चा 5 पर जित हासल कीती। पाडर, डोडा वेस्ट, उधमपुर ईस्ट, श्री माता वैष्णो देवी कटड़ा, रामगढ़ पर जित दर्ज कीती। पार्टी नै 5 प्रमुख श्राइन आली सीटें श्री माता वैष्णो

देवी, रियासी च शिवखोड़ी, पाडर नागसैनी जित्थे मचेल माता ऐ, बिलावर सुकराला देवी ते जसरोटा जित्थे जसरोटा आली माता ऐ पर जित हासल कीती।

<><><><><><>

### Govt. Term

नेशनल कांफ्रेंस दे नेता अब्दुल रहीम राथर ते अली मोहम्मद सागर, दौने जम्मू-कश्मीर विधानसभा चुनाएं च रिकार्ड 7मीं बारी जित हासल कीती ऐ। अब्दुल रहीम राथर जेड़े पैहले आली जम्मू-कश्मीर रियासत दे खजाना मंत्री रेही चुके देन, एहदे शा पैहले 1977 कोला लेइए चरार-ए-शरीफ विधानसभा हल्के थमां 6 बारी चुनां लड़ी चुके देन। 1983, 1987, 1996, 2022 ते 2008 दे चुनाएं च बी ओह कामयाब रेह ते 2014 च ओह पीडीपी दे गुलाम नबी लोन हुंदे कोला हारी गए हे। अली मोहम्मद सागर जेड़े जे नेशनल कांफ्रेंस दे महासचिव न, उनें बी 7मीं बारी विधानसभा चुनां च जित हासल कीती ऐ। पैहली बारी ओह 1983 च बटमालू थमां जिते, 1987 च बी उनें एह सीट हासल कीती। मगरा ओह 1996 च खानेयार थमां चुनां जिते ते ओहदे बाद ओह इस सीट परां कदे चुनां नेई हारे। उनें श्रीनगर निगम दे साबका मेयर शेख इमरान गी 9 जहार 912 वोटें कन्ने हराया जेड़े बतौर इक अजाद मेदवार चुनां लड़े करदे हे।

<><><><><><>

### NC-INDI

नेशनल कांफ्रेंस दे उप प्रधान ओमद अब्दुल्ला होरे कल आखेआ जे आई.एन.डी.आई गठबंधन आला धड़ा अपने भ्याले दी गठबंधन दा नेता चुनने गितै बैठक मगरा गै जम्मू-कश्मीर च सरकार बनाने दा दाबा पेश करोग। ओमर होरे आखेआ जे नेशनल कांफ्रेंस दा विधायक दल

जम्मू-कश्मीर दा अगला मुखमंत्रि चुनने गितै बैठक लाग। उनें गलाया जे एह विधायक दल ते गठबंधन दे भ्याले पर निर्भर करदा ऐ जे ओह कुसी अगले 5एं बरे लेई जम्मू-कश्मीर दा मुखमंत्रि बनाना चाहंदे न। ओमर हारे आखेआ जे चुनां नतीजे सवां एह साफ ऐ जे जम्मू-कश्मीर दी सियासत च लोके बीजेपी दे खलाफ वोट दिता ऐ। उनें आखेआ जे लोके दे फैसले नै पार्टी दियां जिम्मेवारियां बदाई दितियां न। ओमर हारे पीडीपी अध्यक्ष महबूबा मुफ्ती हुंदा बी आभार प्रगट कीता जिसले उनें उनेंगी उंदी शानदार जित लेई मुबारकबाद दिती।

<><><><><><>

ते हुन बाकी दिए खबरे कन्ने जगमोहन शर्मा।

### PM-Congrats

प्रधानमंत्री नरेंद्र मोदी हारे जम्मू-कश्मीर च विधानसभा चुनां दे कामयाबी कन्ने तोड़ चढ़ने गी भारतीय संविधान ते लोकतंत्र दी जित करार दिंदे होई आखेआ ऐ जे उंदी सरकारे जम्मू-कश्मीर गी दफा 370 ाइए, कर्फ्यू, हड़ताल, हिंसां ते बखवाद दिए बेड़िएं चा आजाद कराया ऐ। जम्मू-कश्मीर ते हरियाणा दे चुनां नतीजे सामने औने दे बाद कल राती नमीं दिल्ली च बीजेपी मुख्यालय च पार्टी कार्जकर्ताएं गी संबोधित करदे होई मोदी हारे आखेआ जे जम्मू-कश्मीर च ऐकती होए दे चुनां विशेष ते महत्वपूर्ण रेह कीजे उत्थे पैहली बारी बाबा साहेब भीम राव अम्बेडकर हुंदा तैयार कीता गेदा संविधान पूरी चाल्ली लागू हा ते उनें लोके गी वोट पाने दा अधिकार थोआ जेड़े कई दहाके थमां अपने इस लोकतांत्रिक अधिकार कोला वंचित हे। उनें आखेआ जे जम्मू-कश्मीर ते हरियाणा दे चुनां नतीजे कन्ने उंदी सरकार दा दिल बधेया ऐ ते प्रोत्साहन थोआ ऐ जे ओह भारत गी दुनिया दी त्री सब्बनें शा बड्डी अर्थ बवस्था बनाने लेई

होर मते जोश ते शिद्दत कन्नै अपनिं नीतिं गी अगड़े बधान। मोदी होरें जम्मू-कश्मीर नेशनल कांफ्रेंस गी चुनां च औदे शानदार प्रदर्शन लेई ममारकबाद दिती। तोआई केंद्री गृह मंत्री अमित शाह होरें आखेआ जे जम्मू-कश्मीर च पारदर्शी ते रमानदारी आले ंगै सिर कामयाब विधानसभा चुनां दे तोड़ चढ़ने कन्नै इत्थे लोकतंत्र गी नमें सिरेआ मजबूती हासल होई ऐ जेदा प्रधानमंत्री नरेंद्र मोदी होरें वायदा कीते दा हा।

<><><><><><>

### Omar-PM

प्रधानमंत्री नरेंद्र मोदी हुंदे आस्सेया जम्मू-कश्मीर च नेशनल कांफ्रेंस दी शानदार जित पर बदाई देने लेई पाओर् नेता उमर अब्दुल्ला होरें आभार जताया ऐ। उमर होरें प्रधानमंत्री हुंदा शुक्रिया अदा कीता। उनें आखेआ जे ओह केंद्र कन्नै खरे सरबंधें दी मेद करदे न ते इयै स्हेई संघवाद गी भावना बी ऐ। जम्मू-कश्मीर दे लोकें गी फायदा होई सकै ते विकास ते बेहतर प्रशासन यकीनी बनी सकै।

<><><><><><>

### CEO-JK

मुख्य चुनां अधिकारी पी.के पोले होरें आखेआ ऐ जे जम्मू-कश्मीर च विधानसभा चुनां सफलतापूर्वक सम्पन्न होए। एह केंद्र शासित प्रदेश च लोकतांत्रिक प्रक्रिया दी महत्वपूर्ण गैऽ ऐ। 2014 मगरा जम्मू-कश्मीर च एह पैहले विधानसभा चुनां न जेदे च लोकें दी खरी मती शमूलियत दिक्खने गी लब्बी ऐ। मतदान प्रतिशत लोकतांत्रिक प्रक्रिया च लोकें दे विश्वास गी दर्शादा ऐ। मुख्य चुनां अधिकारी होरें सारे सरबंधी धड़ें जिला चुनां अधिकारिं, 75 जहार थ्वां

बद्द चुनां कर्मिं, कमांड ते कंट्रोल रूम दे कर्मिं, नोडल अफसर ते होरने गतिविधिं कन्नै जुड़े दे मिम्बरें दा धन्नवाद कीता। उनें सुरक्षाबलें दी बी सराहना कीती।

<><><><><><>

### Congress Reaction

कांग्रेस ने नेशनल कांफ्रेंस ते कांग्रेस दे गठबंधन पर विश्वास जताने लेई लोकें दा आभार जताया। मीडिया कर्मिं कन्नै गल्ल करदे होई जेकेपीसीसी दे प्रवक्ता रविंद्र शर्मा होरें लोकें गी मुबारकबाद दिती। उआं उनें आखेआ जे जम्मू खित्ते च नतीजे पार्टी दी मेदें मुजब नेई हैन ते एहदे पर पार्टी कारकूनें कन्नै चर्चा कीती जाग।

<><><><><><>